

ԼԵՌՆԱՅԻՆ ՂԱՐԱՔԱՂԻ ՀԱՆՐԱՊԵՏՈՒԹԵԱՆ ՀՌԶԱԿՈՒՄԸ

Սեպտեմբերի 2ին Ստեփանակերտում տեղի ունեցավ ժողովրդական պատգամաւորների Լեռնային Ղարաբաղի մարզային եւ Շահումեանի շրջանային խորհուրդների համատեղ նստաշրջան՝ բոլոր մակարդակների պատգամաւորների մասնակցութեամբ:

Նստաշրջանը ընդունեց որոշում եւ հռչակագիր:

Բոլոր մակարդակների խորհուրդների պատգամաւորների մասնակցութեամբ ժողովրդական պատգամաւորների Լեռնային Ղարաբաղի մարզային եւ Շահումեանի շրջանային խորհուրդների համատեղ նստաշրջանի 1991թ. Սեպտեմբերի 2ի

Ո Ր Ո Շ ՈՒ Մ Ը

Լեռնային Ղարաբաղի Հանրապետութեան ըստեղծման հռչակագրի ընդունման եւ նրա պետական իշխանութեան ու կառավարման ժամանակաւոր մարմինների կազմաւորման մասին

Բոլոր մակարդակների խորհուրդների պատգամաւորների մասնակցութեամբ ժողովրդական պատգամաւորների Լեռնային Ղարաբաղի մարզային եւ Շահումեանի շրջանային խորհուրդների համատեղ նստաշրջանը, արտայայտելով ժողովրդի կամքը, որը վաւերացուած է փաստօրէն անցկացուած հանրաքուէում եւ ԼՂՄԻ ու Շահումեանի շրջանի իշխանութեան մարմինների 1988-1991թթ. որոշումներում, նրա ազատութեան, անկախութեան, իրաւահասարակութեան եւ բարիդրացիութեան ձգտումը, ղեկավարելով քաղաքական, սոցիալ-տնտեսական եւ մշակութային ոլորտների զարգացման հարցում ամբողջ բնակչութեան շահերով, հայ ժողովրդի միասնութեան ձգտումը համարելով բնական եւ օրինական, միջազգային իրաւունքի նորմերին համապատասխան, որոշեց.

1. Հռչակագիր ընդունել ներկայիս Լեռնային Ղարաբաղի Ինքնավար Մարզի եւ դրան կից Շահումեանի շրջանի սահմաններում Լեռնային Ղարաբաղի Հանրապետութիւն (ԼՂՀ) հռչակելու մասին:

2. ԼՂՄԻ ժողովրդական պատգամաւորների մարզային խորհուրդը եւ նրա գործադիր կոմիտէն Լեռնային Ղարաբաղի Հանրապետութեան պետական իշխանութեան ու կառավարման ժամանակաւոր բարձրագոյն մարմին համարել մինչեւ համաժողովրդական ընտրութիւնների անցկացումը եւ իշխանութեան ու կառավարման նոր հանրապետական մարմինների կազմաւորումը:

3. Ժողովրդական պատգամաւորների մարզային խորհրդի գործկոմին յանձնարարել՝ լայն հասարակայնութեան ներգրաւմամբ նախապատրաստել եւ մարզային խորհրդի քննարկմանը ներկայացնել ԼՂՀ պետական իշխանութեան կառավարման մարմինների կառուցաւածքի ու պարտականութիւնների մասին կանոնադրութիւն:

4. Լեռնային Ղարաբաղի Հանրապետութեան տարածքում մինչեւ ԼՂՀ սահմանադրութեան եւ օրէնքների ընդունումը գործում են ՌՍՀՄ սահմանադրութիւնն ու օրէնսդրութիւնը, ինչպէս նաեւ ներկայումս գործող միւս օրէնքները, որոնք չեն հակասում սոյն հռչակագրի նըպատակներին ու սկզբունքներին եւ հանրապետութեան առանձնապատկութիւններին: